

# Poder Bou di Kontrol

Awendia ta parse ku tur hende ta demandá nan derechonan. Empleado tin derecho riba mihó salario i mihó kondishon na trabou. Enfermonan tin derecho pa haña kuido na hòspital. Homoseksualnan tin derecho pa kasa ku otro. Drogadikto tin derecho pa haña angua nobo. Èts. Ma kiko Dios ta pensa di derechonan?

Hesus a bisa, “*Bendishona ta esnan umilde...*” (Mateo 5:5). Hopi di nos ta pensa ku un hende umilde ta un feila...hende ta frega pia riba dje i e no ta habri boka. Tèstament Nobo tabata skirbí na griego promé, i esei no ta loke e palabra “umilde” ke men na e idioma ei. **Umildat sigur no ta un debilidad!**

E palabra griego (πρᾶσις) tabata usá di kabainan mansá. Un kabai welt tin hopi forsa i tin libertat. Ma su poder no ta útil pa hende te ora ku e ta mansá. Un kabai mansá no ta bira debil. E tin mésun forsa, pero e ta poder bou di kontrol. Esei ta un bon definishon di e palabra: **poder bou di kontrol**.

Un hende “umilde” ta un persona ku por tin outoridat òf forsa, ma e ta skohe pa no usa e poder ei. **Nos tur tin siertu “poder” ku nos tin ku siña kontrolá.** Por ehèmpel:

1) Bo ta kontrolá e poder di bo palabranan? Ku bo lenga, bo por kibra un hende, kòrt’é na wèrki, hasiendo daño for di kua e persona nunca lo rekuperá. Ta mihó pa dominá bo lenga! Dios ta bisa, “*Tin hende ta papia sin pensa, manera hinká di spada, ma lenga di hende sabí ta trese kuramentu*” (Proverbionan 12:18). Kontrolá e poder di bo lenga!

2) Bo ta tene bo rabia bou di kontrol? Beibel ta bisa, “*Esun ku no ta rabia lihé ta mihó ku e podersoso, i esun ku ta goberná su spiritu ta mihó ku esun ku ta kapturá un stat*” (Proverbionan 16:32). Talbes den bo rabia bo tin gana pa “dun’é su kos”. Kisas bo ta mas fuerte ku n’e, i bo ke hak e un wanta. Dios ta bisa, “Mantené bo poder bou di kontrol.” **Esei no ta kobardia! Ta forsa bèrdadero pa kontrolá bo rabia!**

3) Bo ta keda sin saka sla maske bo tin oportunitat pa hasié? Hosé su rumannan no a gust’é. Pa deshasí di dje, nan a bend’é komo katibu na Egipto. Pa 13 aña, el a sufri komo katibu. E tambe a kai sera maske e tabata inosente. Anto den un dia Dios a hasi Hosé un mandatario poderoso na Egipto.

Ora Hosé su rumannan na Israel a pasa den un tempu di hamber, nan a biaha pa Egipto pa buska kuminda. Nèt esun ku nan a pidi pa kumpra kuminda tabata Hosé. Siendo mandatario, Hosé tabatin e oportunitat i e poder pa tuma vengansa. E por a keda sin duna nan kuminda. E por a sera nan den prizon. E por a bende nan tur komo katibu. Asta e por a mata nan. Ma e nunca a saka sla. **Poder bou di kontrol!**

Den e buki, *Les Misérables*, Jean Valjean a hòrta un kipashi pa alimentá yunan di su ruman ku tabatin hamber. Ma manera tabata sosodé den e era ei na Fransia, el a ser arestá i bai será pa 19 aña. Ora el a sali di prizon, e tabata konsiderá un kriminal i no por a haña trabou.

Un anochi un obispo a dun’é kuminda i a lag’é drumi na su kas. Ma Jean a someté na tentashon i a hòrta e obispo su tayonan di plata i a bai. Jean a wòrdu arestá i tresé bèk serka e obispo. Ma e obispo a bisa, “Mi a dun’é e tayónan. I Jean, bo a lubidá di bai ku e kandelánan.” Impreshoná pa e kariño di e obispo, Jean a bandoná e bida malu ku e tabata hiba.

Beibel ta bisa, “*Nunka...venga boso mes...ma laga lugá pa e furia di Dios, pasobra ta pará skirbí: ‘Ta di Mi vengansa ta, Ami lo paga bèk,’ SEÑOR ta bisa*” (Romanonan 12:19).

Nos ke sa nos tin sierto derecho...sierto “poder” ku nos por usa pa satesfasé nos mes. Dios ke pa nos boluntariamente pone nos “podernan” bou di Su kontrol i mira nan komo privilegionan ku E ta duna. Esei sigur no ta debilidad!